

申忠愍诗集 明 申佳允

钦定四库全书

集部六

申忠愍诗集

别集类五

明

提要

臣等谨案申忠愍诗集六卷明申佳允撰佳允字孔嘉永年人崇祯辛未进士官至太仆寺丞甲申殉流寇之难国朝赐谥忠愍佳允为杞县知县时死守孤城卒击破流寇扫地王其经济有足称者官考功时以举劾公正忤温体仁至于降谪及官寺丞方出巡牧场而李自成围京师势可避匿或劝之弗入佳允流涕曰固知京师必不守然我君在焉安危共之何所逃避卒以甲申三月十二日崎岖还京十九日死于国难其气节亦震耀千古是集为其子涵光所编涵光有家传称其于诗好称李梦阳何景明今观所作与何李颇不相似大抵直抒胸臆如其为人但体格尚未成就且不免浸淫明末纖仄之习然凜然刚正之气足使后人起敬不敢复以诗格绳之言以人重乌可没也旧本首载孟津王铎序不着年月核其所述盖作于崇祯初佳允官杞县时后人重刻此集仍录以冠首然铎何如人乃操笔弁冕佳允诗今特削之俾无为佳允辱焉

乾隆四十六年四月恭校上

总纂官（臣）纪昀（臣）陆锡熊（臣）孙士毅

总校官（臣）陆费墀

●钦定四库全书

申忠愍诗集卷一

（明）申佳允 撰

○五言古诗

见圣堂感赋

少读封人编倦焉怀远托今者至于斯封人不可作风物尚依稀衣冠半零落顾兹太古民浑浑而噩噩河北緑林秋前年恣焚掠登莱倒干戈曹濮惊风鹤余亦抱关者夜深催击柝灾害复相仍彼苍一何虐安得封人起呼天叩求莫欃枪两地清禾黍三秋获道路无聋瞶春风何寥廓一帘案牒闲万户弦歌约天下惟有道人心自木铎

黄梁祠

巨鹿树殷腥黄河碧涛死蛇豕偪荒林鱼龙积断堉缥渺丛台月春风照鼃水邯郸孤堞悬黄梁埜祠峙马影竞夕阳鸟声沸■〈山畏〉■〈山晶〉午移炊火新秋合烟光紫醉醒蕉鹿场真幻莺花市天地划然回荣枯率尔驶短褐狎风尘甕枕认原委稽首叩仙人吾师注梦史

王祁连先生书荐相士

有客楚中来叩门投双鲤为谁寄书邮云是王夫子夫子令邯郸四野歌乐只风尘
髻穉中期予天下士发祥扁敝庐母节扬闾里感此覆载恩而敢忘没齿鳬飞入长安天
涯真尺咫今春解组归扼腕遭谗毁梦魂楚山遥捧读胡不喜大业勛千秋低眉欲愧死
叮咛寄书人相士莫踰此惭予骨气酸握手怜相视贫更苦赠贻无计充行李东郭一相
招浊酒淡于水尺素悬斋头如坐春风里

赠建德徐君显

有客清源来萧寺倾谈吐翩翩文献家季叔徐工部工部莅荆州司李迁广武手不
持一钱儿卒詫清苦布素屏绮罗脱粟絕羞脯志不在饱温面目存酸腐性复好施予不
但无所取入嗇出偏奢萧然一贫窶典與佐饗餐卖襦賑鰥姥任满升冷曹厂署清源汴
清源何繁华工部视如土亦如广武时闭眼却阿堵貌癯弱不胜那复见华廔贪世获兹
人是谓今而古北斗仰高风忽于犹子覩了无膏粱容落落一叔父不敢歛酒肴况乎给
资斧犹子岂为竒孤高世德谱飘然上平阳倾盖情如缕赠以玉壶冰工部应无怒

清狱

下车泣囚心千载生生意顾兹縲紲场惨烈魂为悸旱魃煽炎威能无冤气积斋沐
虔以清涤扫周为视爰筑好生房庑广狴狴嗣入狱疫自除生子吴为字善气满悝囊慈
航渡法地虐吏何为者竟以杀为媚

训子

顾尔髻未垂诗书急讨论人禽此其界得失为之根勿骄贵而气勿纵放而言清贫
念尔祖忠厚乃吾门十寒则一暴舍亡则操存宁拙勿为巧过朴不厌浑斯语置座右奉
为金石尊

忧旱

河伯怒未已旱魃骄益炽山川何涿涿千里几赤地仰瞻云汉忧能无监门泪竭兹
斋祷心勅罢屠酤肆愆尤省厥躬精白感天意一雨霖霖生再雨优渥遂大有卜今年小
民戴灵赐声欢动千雷忧隱中如刺人曰旱之终予谓涝伊始旱涝巧循环相因复相视
亢阳满则除阴霖芽且孳寄语河上翁莫以泄沓戏

賑饥

羣盗猾河北长堤啗阳侯顾兹孑遗黎能无惕惕忧捧檄煮粥糜晨起验斛区伛偻
积厂市匍匐饱菑疇寒风何淅淅野杵亦叟叟呕心输粒籽屈指数麦秋缓征白骨起减
租菜色瘳耘兹一寸田何必万石籩抚字苏鄙隱陋彼移粟谋

南雍七子诗

天涯宦迹左迁多每诵斯言殊增浩叹南雍岂其地耶何迁人猥集也良友如云蔚
焉剑合亦一时之异也作七子诗

姚都諫思孝

淮南春翠蔼幽谷何窈窕文章焕国华风雅矜清妙花砖拂瑞烟梧掖红庭燎摇笔扫欃枪请剑撼苍峤错落风雷泣震荡山鬼啸敌气骄秋尘神龙轶险突环玦循无端瑚琏重清庙南国有佳人北极遥瞻眺

李侍御谟

天上仙人谪三吴起凤翥趋庭富缥緲谱县蜚清誉驄豸惊郊甸绣斧侮贵倨萧萧仗马鸣莘莘朝阳曙园桃寄行谣盘涧矢寤语文史闕高斋公侯尔逸豫

王给諫之晋

氤氲积河雒荡宕水弥弥高慧追前喆秀挺产灵姿三辅汉循良梧垣振风规抗笔摇青霄折檻鸣赤墀劲骨激高倡素气斂冲夷焚香而隐几悠悠证退思羨门子何人仰止是吾

师张检讨居

上谷郁英蔚灝气涵渊穆峭石逼嶙峋孤烟浮大陆冠笏玉阶升簪珥金瓯卜红药雾霏霏瑶草风谖谖霄汉翔凤鸾霜雨凌鸿鹜倚徙钟簷间苍莽崧衡矗

金选部郎丽兼

大雅推前辈领袖羣衮先翩翩皇华节蹕■〈足 燮〉春明间山川何硕俨湖水亦凝然清辉澄金镜冰雪静炎天遁思林泉驾省眼借名贤时事值纷纭砥砺徒自怜矫矫烟霄客猗欤簪绂仙猿鹤久相狎芝草若为延顾兹秣陵选秋风速锦鞞

刘仪部士琯

汤汤辽水阔之子扬清芬骏骨黄金重天衢浩鸿文飘然眇华要肝肠澹雪雯胸揽梁园秀笔空薊塞尘抱志在静远世味何氤氲素心夙相照梦寐若为羣

自序

淒淒风雨夕俯仰更谁论束带趋承明惕惕戒晨昏爰览山川胜春晴照白门荡然天地在庶几吾道存睥睨浮云意啸歌金石文慷慨随所如形骸若为珍此行殊寥廓玉汝以渊源

赠姬太仆太仆旧滕令也滕陷太仆死之赠今官子琨为户部郎乞诗赠焉

天荒尘日霾谷撼沙风谖寒戍吹悲笳严城拂迅镞羣魑积埜丛万狸窜厓渎妖虹繁炎飈兵焰毒龟麓糾桓鸟兽让刀戟烟云缩三日黯琴鳧孤军惨骸髑楼櫓横危埤鞞弓悬磬嫫嚅喷雪寒渍血溅霜肃紫电气阴森青史星光昱强哉昔常山岿然今太仆

申忠愍诗集卷一

●钦定四库全书

申忠愍诗集卷二

（明）申佳允 撰

○七言古诗

冉子祠

烟火寥寥瓜井村秋风落日伯牛坟岿然老树碑阴矗岚影波光拂垄云仰止斯人名不腐科悬德行书悬谱平原宾客气如虹沙草榛芜何处土半世车尘厯落中九京赢得郢侯封一抔伏腊惊樵牧灵雨春滋卉木秣传浴温泉事恍忽石青篆碧探残碣闻风兴起古今情何问衣冠何问骨

杨椒山先生祠

十载公交车过上谷成仁祠下霜风肃拜像拟招忠愍魂拂碑欲食分宜肉父子阁老焰薰天满朝那复羞奴颜十罪五奸鸣仗马诛凶一疏日星悬天地昏霾神鬼泣浩气丹心血化碧含笑龙逢地下游英灵缥缈直声奕吁嗟乎蜃市冰山顷刻形荦犖俎豆千秋荣分宜当日心已死忠愍今日气犹生

寄祝杨春台同年

吾郡同年十七人惟君与我情更亲地分百里虽悬隔夢寐周旋笑语频一日君来谒太守留连萧寺三更酒约予共作清源游鸡黍相邀不置口长至纔过践素盟奚囊驴背到甘陵欵扉倒屣欢迎入下榻挑灯意气横畅饮高歌几日夜忽闻兵逼遵阳下匆匆分袂整归鞭半扰离忧半恐怕冬尽都门报解围春光倏忽柳花飞小牕偶坐翻年谱二月知君诞降时不谓同年尔我独同年同月伊为熟只兹明媚仲春天廿九为予君廿六选箴题诗代举觞维祺首为祝高堂兰芽蚤接琼林瑞棣萼平分桂树香大物明年知唾手南宫奋发仍黄耆同飞愿得附青云予亦因之而不朽

登刻凤楼怀李小有

仙李当年寓此楼下楼倏忽已三秋每于晷罢闲登眺搔首浑如天际头刻凤主人曾到鲁邸逢小有话离苦重来楼上问何期日选十三月选五五月明朝恰十三计程三日至清源先期不见飞鸿信予怀渺渺默无言安得翩然蚤握手楼头十日留小有如云楼下订前盟一曲长歌百斗酒

将进酒

君不见健儿骑马捷追风纵横十万屯卢龙又不见渔阳将领燕姬妾骷髏半带豺狼血洛干还是太平春咲尔何为愁不辍寛解胃肠惟醉眠羞涩囊中探数钱且酌且歌且自舞醉来白眼欲问天高阳徒曲秀才呼我共追陪秉烛熬长夜狂呼大叫声如雷百斗颓然复一斛星淡虫飞晨光开卧倒如泥醉欲死强起顾酒心不灰一日余生一日醉酩酊傲杀醒眼辈不必玉薤并罗浮浊者浇脐清沁肺一片月十里荷携壶处处醉颜酡那问人世有干戈

太康令魏于野殉城烈烈吊以诗

秋风猎猎葵丘道衰草枯林吹野烧令君踣躅女墙低烟火阴阴照寒峤黄沙惨淡太康城贼骑环围万堞平罗掘雀鼠红焰起令君血泪裂双睛戊楼霹雳天鬼怒睢阳平原君其伍青史白虹刀戟横千家髑髏泣酸雨沧桑易位陵谷翻精灵不死须眉尊忆君道左绋袍语短歌凄咽拟招魂

申忠愍诗集卷二

●钦定四库全书

申忠愍诗集卷三

（明）申佳允 撰

○五言律诗

夏日斋居

斗室袅幽光炉薰百和香累书堪作枕支石可当床树色连云密蝉声带雨凉北牕
高卧久一梦晤羲皇

怀李聪峦随宦新甫

少年何大雅标格更多奇洒落羲之字风流白也诗旧狂看击筑新恨听歌骊无奈
相思处空阶夜雨时

其二

谪仙天下士声价仰鸡林我质堪攻玉君情可断金风骚推酒圣山水识琴心怅望
天涯隔啼痕洒素襟

其三

御李非朝夕相看眼自青秋风同宴鹿夜雨共囊萤乍别分云树余愁付醪■〈酉
灵〉出门谁是侣白昼小斋扃

其四

临别河桥上扶桑日正暎披襟频握手岐袂欲消魂浊酒留征骑清风促去辕今宵
何处宿曾否忆家园

其五

从宦游齐鲁云山望里开清光留宴席佳气照徂徕独我翻书帙同谁酌酒壘归期
何日是把臂坐莓苔

其六

榆社纔分袂临淄聚客星昼长知课弟衙静忆趋庭夙好怜风月离愁恨水萍寒牕
今冷落怅我倚疎棂

其七

一望云烟渺蛩声四壁秋有怀频问月无兴强登楼水隔三秋恨星分两地愁相思
浑不寐欲泛剡溪舟

其八

飞鸿衔尺素秋杪是归程扫径迎霜色留杯醉月明牕虚看雁影院静听砧声好践
庾楼月狂歌整旧盟

元宵风雪独酌（次宋仍白韵）

暮云含月影灯映雪楼明梅冻寒香散帘疎冷气生烟花迷火市笙鼓乱春城半榻

偎炉坐陶然酌巨觥

哭郑蕙圃八首

怜君方壮岁一病果难支仁者何无寿天乎讵有知共欣初展骥岂料遽骑箕言笑依然在凄风搅梦思

其二

白玉楼为记翩然去不辞六旬应念父七岁忍抛儿黄卷生前事青衫死后遗幽明从此隔渺渺竟安之

其三

功名同颀颀意气许千秋愧我贫如洗怜君病不瘳歌残流水调影散碧云楼吾党今寥落交情何处投

其四

百年俱幻影修短问谁逃吾社无牛耳君家失凤毛雄心三十折苦志半生劳知己频挥泪宁堪续楚骚

其五

共恨哲人逝千秋事业虚萧疎空院竹冷落满床书梦断池塘草魂依广柳车黄昏风雨夜独坐几欷歔

其六

天上庚星暗修文夺隼才荆花欣共茂蕙草恨先摧剑掩流虹色珠埋长夜台临风歌薤露瑟瑟助余哀

其七

讖应龙蛇梦年来失郑玄遗琴悲响绝剩笔羨如椽易箴应怜尔抚膺叩彼天图书收入篋不上孝廉船

其八

三年纔际泰一旦又遭屯长恨遗妻妾孔怀頼弟昆有铭聊纪迹无赋可招魂不信英雄泪灵衾试验痕

登卢见白新楼

忽讶朱楼起凌空气象殊藻香分璧水树色傍城隅剑合长虹灿灯悬片月孤临风惭作赋叨醉步兵厨

其二

空斋不耐寂乘兴数登楼问月敲碁夜翻书下榻秋烟光四野合云树一天浮吟眺浑忘去凭栏豁醉眸

且隐斋

不必山林卧空斋白日幽苔溟晴亦雨云冷夏疑秋香篆沉金鸭湘帘下玉钩此中多隐意抱膝思悠悠

除夕

长安烽火炽愁问岁华新正是勤王日谁为破贼人乍惊离乱地回忆太平身愿得春音捷安居不厌贫

除书

除书六月下束带促星轺凭我夸强项逢人自折腰纷纭惊积牍奔走溷卑寮仙令俱虚语几人王子乔

之任

问渡大河口离舟即下车登楼城树迥扫榻梦思賒暂乞趋迎假闲排朔望衙予怀忽渺渺滢水天之涯

雍丘道中

望望雍丘驿村鸡报午余远林衔塔影细雨落肩輿瘦骨风尘倦吟眸眺览舒平芜敷野绿山叟荷春锄

赠别陈子

悠悠滢水梦落落剡溪舟竹乱连床雨灯悬一榻秋奚囊诗草黯客舍墨香浮前路谁知己天涯破阮愁

赠郭子

下榻留征骑烧灯共客吟万金烽火信一夜故园心韵骨风尘老交情契阔深行行须郑重兵气满山岑

其二

策蹇成孤往吟魂逐夜賒平生犹雪意消息此梅花贼起兵为路身闲客是家寒云迷去眼翘首葛山遐

其三

避乱疑无地清平尚有斯千军犹胜负一水即安危梅苑调孤鹤琴轩钞旧诗清缘应共享落落问何之

其四

为有探梅约飘然访戴船干戈行路满诗酒客心偏孤榻无尘牍寒衙欲雪天此宵须痛饮离思在前川

过黎舍中生祠

山斗关西望文星照浚仪攀留依众母瞻拜仰吾师两地弦歌绩千秋德政碑春风霏化雨酺酒使君祠

夜泛

苍茫浮一艇两岸受风徐拂袂尘颜澹悬帆客感踈星辉不似夜浪定稳于輿片月神孤往蘧蘧梦觉余

杞园晤秦圣俞

逐逐风尘色聊偷一席闲联床删宦格伏枕话时艰旧好添愁鬓新闻冷笑颜脊梁
须竖起百折耐间关

感事

借箸偏曹濮长城失太行黄榆飞潞泽王屋下邢襄骨悸闻风鹤魂腥逐办铍大河
千百里莫谓惜鞭长

其二

烽火连辉济横尸覆野蒿金钱明主诏斯斧大军劳精悍矜三捷纵横问六韬彤弓
方郑重敌忾自同袍

其三

洪流天堑折防渡胜防城楼櫓寒涛断旗帆落日横此中大泽险到处野狐鸣莫但
愁河北三湘亦弄兵

其四

羽檄夷梁震兵荒患剥肤饱腾催市骏匍匐问蠲租战捷功方上叱离骨已枯将军
驰露布愿附监门图

吊刘烈妇

卫国有烈女高风俗可维形骸委土木巾幗傲须眉冰雪霏烟树松筠覆野碑三年
官媿我为补栢舟诗

甲戌二月九日

春明千里雪回首五云深真幻当年梦推敲此夜心弹冠悲徃遇击筑欲长吟荏苒
俄三载牢骚思不禁

赠别冯作霖

宦情惊夜雨蹇影度春阴侍立怜僮意兴居慰客心剑分虹自合雪满玉为林明月
今何夕高吟拂素琴

李映碧给谏谪归

落落江烟白翛然孤眺余浮云凌短筑春色隐华裾焚草乾坤在脂车风雨疎首搔
天际碧湖海祝虚徐

其二

醉酌春明酒高雯漫遠潮挂帆江国邈弹剑野云遥骈■〈骨莖〉千秋慙峥嵘一
叶骄氤氲霏雨露环佩接仙韶

怀归

秋澹寒烟合浮云碣石宫乾坤惟伏枕身世此惊弓山雪霏轻霰藤萝霭碧虹聪明
山不遠青翠落空蒙

其二

紫葛参差秀临风欲蹑从林峦乡思切霜雪宦心慵芳草随双屐疎烟傍短筇百年

春事老幸我未龙钟

其三

滢水午桥曲遨游即锦江鸥盟依雪棹渔酷泛春缸仕迹惭水镜乡心傲碧幢入林
甘自矢漫隐学南凉

其四

一线清漳水弥弥泛遠陂江湖原汗漫菰藻任葳蕤霜老伊人在春深季女饥采芝
南涧下从此慰期頤

其五

十里芙蓉国城闉香气霏楼心浮翠杳潭影下清晖世路俱流水秋风一钓矶疎狂
原具癖能与素心违

其六

烟树中丞墓南园十亩居醉余浇野竹睡起摘畦蔬佃仆驱犁犊儿童慰笋舆春城
风雨事搔首问村墟

其七

蒹葭天际碧归梦瞩平芜秋墅开莼渚烟堤集埜鳧茅茨谙素业风月恕狂夫不信
沙洲遠云空雁北呼

其八

未熟邯鄲梦黄梁祠在西水村烟杵隔野火岭云低车马山灵笑莺花客思迷仙人
不可见咫尺是丹梯

其九

逐逐尘颜老萧森木石斋论文惟白社归计只青鞋澹宕烟簑月参差玉树阶掩关
秋雨静如水夙心谐

其十

锄茅结草屋透迳滢阳隈树树岚光合村村寒日开雨声凌野塔月气射丛台非市
非山际横襟一举杯

其十一

寺忆读书处清钟识慧因闲僧皈贝叶薄宦媿霜筠水木通禅理人天有静春洒然
尘劫外印合宰官身

其十二

望望南堤路春游霭岫云虹霓原剑合车笠倏星分不爽幽兰约重寻白鹭羣荻花
沙水岸鸟语隔烟闻

其十三

黄沙村坞合层树数衡门灵雨浸畚径麦秋灌菴园烽烟客梦绕鸡黍古风存半隐
双扉寂栖迟问主恩

其十四

愁鬓惊秋簟幽栖梦亦安辛勤唯采蕨报答此和丸烟雨从芒屨风华傍鷖冠京华
高马足客思浊漳干

其十五

羣盗纵横极愁来冷笑颜洺州关上月粉社梦中山天怒风霾恶云空木叶闲家园
一夜泪隐几落潜潜

其十六

荒塚荆榛里溪桥细雨天浮名销白日流水托朱弦尘满横戈地云生落照边猿鸣
空谷外憑吊亦蹉然

其十七

城角高楼起清辉眺碧寥凌风堪拂袖凭檻任横箫放浪浮鸥屿艰危悟鹿蕉旱蝗
千里赤三径已萧条

其十八

青天蜀道险安步入南郊载酒谋逃市藏书着絶交马瘡凭蜡屐拙认春巢白眼
云霄上无材自苦匏

其十九

赵陵新战垒愁思在东皋野水消尘骑春烟醉浊醪素琴奄往事高枕属吾曹感慨
官为累晨风拂鬓毛

其二十

非不春明恋其如风雨何孤烟归大麓晓日渡滹沱缥缈空声相鸿蒙发啸歌佛楼
霄汉回醉眼碧嵯峨

其二十一

秣马晨征意心旌乱晓衙低回怜鹤影消息问藤花紫蘚春前绿娄山雨后霞丰林
千里梦渺渺落天涯

其二十二

岂敢嗟时事风尘已办装行藏余马骨岁月悸羊肠云满鳬鹭国沙高薜荔墙升沉
天莫问倚杖听沧浪

其二十三

刻凤楼头月芸晖续旧盟绿筠垂几席白酒坐柴荆离乱朋情合登临雁羽轻连床
虚榻待乡国有嚶鸣

其二十四

草堂寻旧迹结构水南亭窃禄三年素谋生十亩青秋闌春药臼竹院谱茶经携手
同心侣京华怅落星

其二十五

蓬荜临寒井春栏忆共凭一行膺绂组十载隔晨兴罗雀堪题署冥鸿亦避缯春阴
临大伾矫首欲飘凌

其二十六

支离愁病骨畿甸朔风柔此日多麟凤一官自马牛霞城青岱岳龙渚碧潭秋双眼
乾坤外生涯在十洲

其二十七

盘礴高雯上萧疎万树阴世情何按剑吾道合抽簪黄鸟春林语秋虫夜雨吟中怀
聊自喻山水寤言深

其二十八

乱后修山墅新丰易水南邢州烽燧逼王屋树烟含故老存袍泽乡风是织蚕索居
何落寞村市有丛谭

其二十九

篮舆菡萏下春梦揽霞檐诗酒情原狎溪山兴不廉狂其从毕卓简则学陶潜岂必
麒麟阁勲名乃合尖

其三十

桑干河水白无恙挂秋帆雪满高人屨风吹隐士衫论交俱六吉阅世欲三缄苍莽
恒阳树天风振石巉

临淮道中（次李小有壁间韵）

驱车巉石路日暮倦高翰山郁衔青霭星微澹野澜敲诗灯焰逼拂剑旅魂安名胜
乾坤在霜风木榻寒

九日过滁同卿洧盘先生招饮阳明先生祠

东篱何处酒此日恰登山双屐涛烟湿孤筇柿叶斑逐臣天地阔胜会壑云闲学道
他年事萧骚澹客颜

木末亭观雨

树杪悬空霭亭皋引杖藜江涵光泠泠日晕湿垂垂我辈人天合羣山烟雨宜僧闲
扫落叶霞影散葳蕤

鸡笼山晚眺

落日陟高原台城秋树存客劳湖影静佛古塔光尊山宕僧能睡竹深鸟不言空虚
皈片石把臂欲探论

水西门外泛舟

载酒临寒渡春阴罨客厨翠微天阙树烟雨莫愁湖双鬓怜沙岸孤舟寄野鳬江云
何黯澹欸乃若相娱

雨花台

梅冈春雨霁游屐满嵯峣烟柳矜三月风华澹六朝霏微禅径湿醒醉粉香销漳水

南园绿相思客梦遥

秦淮夜泛

客梦寒村水春浮细雨天桃笙清吹落梅阁翠花悬灯影翻诗叶渔烟罨酒船相思
芳树老纖月亦嫣然

郑超宗孝廉同姚永言都谏招饮影园赋赠

片艇匆匆渡深宵澹澹过道心兰社合星气影园多季女相怜语孤臣一晤歌清漳
悬十亩仿汝问烟萝

连白石前辈赠鹑鸽翁诗一章后学申子偶读而壮之次其韵

莽莽寒烟矗苍茫关树深山青碑是史官墨埜存箴万乘批鳞气千春仗马心岁寒
诗句在倚剑雪花侵

即事

世事今寥阔春风且客杯天高云澹宕客静鸟徘徊海国烽烟剧西山翠色开悠悠
薄宦意倚徙荡尘埃

其二

峥嵘双阙迥缥缈宦情微扫榻春深巷扶筇日掩扉江湖犹汗漫琴酒亦清徽往事
看炎雪浮云澹客衣

其三

名岂山公着疎狂曼倩同塞云怜失马鸟羽悟伤弓万事春烟外孤亭细雨中病看
山遠近倚檻慰飘蓬

其四

赤羽孤城合黄尘野兽悲乾坤何罾栗风日自逶迤官冷禽鱼狎庭闲草树滋天涯
悬客梦渺渺浊漳湄

申忠愍诗集卷三

●钦定四库全书

申忠愍诗集卷四

（明）申佳允 撰

○七言律诗

帝京乐（次韵）

春明车马接清銮风雨谁歌载道难瑞日羣峯看拄笏浮云双阙问弹冠鹤厅藤树
垂朱实鲸海虹桥散碧澜石磴竹庵鱼鸟阔相将嘉会证檀栾

家园乐

吟魂日逐滏河濱击钵呼瓢待主人白社生涯悬十亩青鞋消息属三春藤萝启事
江湖邈风月怜才雨雪新矫首午桥烟树外醉醒双眼卧苔茵

春兴（和韵）

霰气寒花处处飘春城烟水湿青条
霽声细柳墙阴落帘影新丰酒市遥
日静双扉虚鸟雀宵深清簟冷霜
绡树低缥缈孤云矗芜草茸茸踏
午桥

其二

冉冉晴烟碣石尘声繁箫鼓溅花
春剑摇赤羽星寒渡月蚀黄霾断
野榛炊火湮零山墅阔毳庐迤邐
塞云屯寒衙索米凌凄月芳树村
醪傍葛巾

其三

雪苑铜驼问蓊茫丹楼粉堞击沙
棠烟深王屋山山白秋惨陈桥树
树黄万事沧桑云窈窕孤城灯火
月苍凉并州花鸟吟魂媚冷雨青
磷泣野篁

其四

榆关如线碧天流紫塞黄崖鐵簃
秋白日渔阳山戍黑霜花岛屿阵
云稠孤帆影断呼庚癸一派星熹
照髑髅掩袂长歌双鬓老丝丝泪
雨湿箜篌

其五

依然百雉险巃嵒一夜酸风射埜
丛巨鹿孤营沙磧外溱沔古渡夕
阳中健儿奔駮扬骁马诸将逍遥
挂角弓重忆昔年村社酒麦秋无
恙雨蒙蒙

其六

汉水樊城遍鼓鞞大堤花艳晓烟
迷九江钲鼓凌天险万国梯航问
野湄开府登坛悬鹄印朝廷推轂
拥龙旗秣陵笙管秦淮渡欸乃魂
摇畫角吹

其七

阊阖霜回紫气寒女墙高砦雾漫
漫天悬埤垓卢沟月山逼巘岷易
水滩羽檄横驰连朔漠铙歌飞捷
沸长安明光賡和阳春曲气合双
龙倚剑看

其八

春明愁绪倚青柯细雨孤尊此啸
歌人事物华余汗马朔云边月悟
烟萝浮丘山畔悬丹灶菡萏池台
挂碧簑矫首看天天遠近吟髭如
雪夜来多

季夏全李郁林卢省潜卢静虚刘建侯郊外泛舟归饮贾襄一书舍

乘兴飘摇一叶舟阊仙许我过斋
头青毡趺坐翻书帙白眼斜看醉
酒瓿树隐蝉声方噪暑风生羽扇
忽惊秋归来不尽登临意何日联
翩续壮遊

寓清河闻警

甘陵一夜客心惊闻报中州近苦
兵共道圣明方应运如何盗贼敢
横行千军满地骷髏血百里连天
鼙鼓声肉食寻常矜胜算问谁今
日请长缨

余侍御随车雨

驄马南行豸绣香如焚天气忽生
凉随车喜洒平原雨驱魃惊回御
史霜灵贶有权何杲日麦秋无恙
即甘棠商霖遍慰瞻霓处岂独流
膏在滏阳

元宵风雨寄懷小有（次贾襄一韵）

冷落春城澹似秋萧萧良夜阻狂
游风吹灯火云何黯雨乱笙歌月
亦愁独坐有怀

烧烛尽相思无梦到床头应知白也偎红翠醉倚朱栏十二楼

其二

阴阴火树满天秋风雨谁堪秉烛游笑我孤吟偏不韵怜君独醉更多愁三生意气
何青眼一夜相思几白头愿得来春灯市里长安同上酒家楼

闻捷

公交车落魄壮心残捧檄魂惊拂眼看数载自怜三刖足十年谁料一弹冠征袍雪
满痕犹湿匣剑光摇色尚寒莫向春风夸蹀■〈足 燮〉机声断续忆熊丸

随驾步祷天坛恭纪

文华斋宿帝咨深南望郊坛玉趾临祇为万民祈润泽敬将六事问桑林星驰鹭序
清光霭云覆龙旗夏木阴趋侍天颜看尺五乍惊茅贱厕华簪

过大廷尉张汧东先生故居

勲庸那复怅夷陵春敞龙门喜乍登官以素盟知世胄事从父老问中丞恒山犹借
甘棠荫浚水应腾桂玉称回首午桥开府墅松楸似此郁葱曾

其二

文章牛耳斗山名振起中原白雪声钟鼎器从炉冶出纶扉春向药笼生箕裘世衍
青绡业杖履风高白社情莫道樵渔忘魏阙阴阴桃李自峥嵘

其三

春满滹沱忆使君名垂竹帛净烟氛燕关不改旌旄色麟阁犹惊颇牧勲正色拂衣
何矫矫低颜献媚任纷纷哲人虽逝芳声在不是虚传諫猎文

其四

十年南北渺双鱼浚水新除六月书蔽芾棠阴留召泽缤纷玉树拂潘舆两河声着
鸣珂巷四壁诗留退食居公子风期殊落落懒于官舍曳长裾

渡河阅兵

春风百里大河清酺酒临流欲洗兵帆影低垂迷野渡浪花高溅射霓旌登舟气夺
萑苻魄鸣镝音连欸乃声青野尘恬烟火寂桑麻踏遍话阴晴

壬申元旦

十年落魄老燕京蹀■〈足 燮〉春风荷圣明一命滥膺花县宰两河羞振铎音鸣
椒盘初荐歌尧寿斗柄星回咏夏正愿得浚郊为乐土桑麻无恙绿林平

元宵夜酌

箫鼓花城处处声衙斋命酒牋尘清踏歌断续屏音乱烛焰参差火树明香入诗脾
梅问约寒侵韵骨雪寻盟春风淡宕弦笙沸卧理闲舒乐只情

课农

霏微晓色促星车踏遍春畦到日斜负郭四郊俱种穀河阳一县即栽花犬声断续
知邨坞帘影高低辨酒家父老共商南亩约公余重喜话桑麻

读王肃敏公集

灼灼声华北斗县青缙大业照遗编中原才子先何李鲁国文衡并蜀燕采振木天
惊凤翥名高梧掖媿寒蝉如今海内知司马一剑龙精有世传

壬申初度

崧高惟岳媿生申狗马微辰又值春萤火十年孤子泪风尘初度宰官身衣冠客集
称觴满玳瑁筵开戏彩新去岁草堂今日宴泥金声到潯阳滨

同熊辉玉蕙石公渡河感赋

檄传东海又横戈浩浩洪流感慨多我輩为情原似水此心不共有如河悬旌一扫
欃枪气击剑争闻欸乃歌无恙布帆春色老扁舟酹酒问重过

赠别驾王仁之

藜光照映极星高白社青山醉浊醪渟水盈盈悬剑履浚郊孑孑媿旌旄骚坛久竖
中原帜寶气常涵别驾刀何李沦亡春雪黯乾坤同调属吾曹

炼城口阅工

水来天上险黄河牛马风烟日日过雁落长堤寒杵动鸿飞中泽夕阳多荆隆一夜
桃花发练苑三秋瓠子歌收得安澜碑勒绩禹功楼上望仙舸

课士

落落文星璧水清中原牛耳怅寒盟草玄乍广谈经席问字偏含下榻情剑合虹霓
成五色赋裁珠玉动连城春林载酒听黄鸟遮莫嚶嚶唤友声

偶怀

秋风一棹浚城湾斗大孤村此抱关病却风尘聊浊酒倦登斋阁即青山麦秋无恙
花封寂诗社多緣韵事闲渺渺予怀天际阔藕花十里梦中还

赠熊辉玉广文

南州高士久驰声载酒玄亭韵骨清虹气一天龙剑合祥光百里德星明文章君岂
青毡老肝胆吾将白水盟落莫相看交道古纷纷轻薄自人情

喜雨

长堤夏木拂轻阴與梦悠然洒素襟遠近山光含蜨影参差树色隐蝉吟千箱共话
逢年约五斗应知退食心喜雨亭成翻罢酒河流极目怅秋霖

闻广文贾襄一被劾

弹章何事到寒毡归路萧萧侠骨坚道已将穷文未丧世皆欲杀我犹怜青山白社
囊新草赤水丹炉谱大还荒芜故园松菊老一犁春雨汶阳田

赠别徐纮亭

一榻尘封退食轩何来徐孺下陈蕃不辞剡水三冬棹岂但平原十日尊风月有緣
分主客菊松无恙讯田园苍茫云树天涯别雪满高衙有寤言

咏汝南先祖姑太宜人

月旦高悬画荻堂神从地下欲相将婺星久照宜人传皎日长垂太史章有子能存
千载祀此身不死百年康于公驷马临祠宇彤管香留鬱秀芳

杨海来报最

圣主旁求耳目臣三年课最报枫宸都亭早办豺狼疏琐闼行清輶轂尘两邑歌声
出畏垒九重勅命下征轮于今虚却山公席指日云霄问要津

讯王仁之病

灯花彩胜满春城高卧如何一榻清白社苦吟怜大瘦丹炉新熟问长生虹流剑气
大边合蚌产珠胎掌上明好踏星桥扶杖起箫弦队里杂吹笙

黎伯雍报最

才子专符捧御除循良今上雒阳书三城花绣潘安宅万树棠甘召伯闾丹凤诏来
云作锦双鳧舄下雨随车长安近日虚銓席翹首新纶出帝居

留别刘熙隆

夷梁剑气满寒林一叶浮沉碧水深客泪潏潏惊夜雨予怀渺渺怅蛩吟十年伯仲
朱弦奏千里芝兰白雪音荡漾波光催去棹相思夜夜溘阳浔

赠别卢邻虚

春风夜夜步兵厨宦思乡愁两地俱下榻十年怜刻凤挥琴一室愧飞鳧梁园白雪
虹光合浚野朱旄剑气殊回首午桥天际碧青山何日赋莼鲈

赠别卢省潜

寒衙月霁客星悬握手重期下榻缘萤火十年风雨夜渔邨一棹孝廉船烧灯醉拂
青萍剑擊筑高吟白雪篇魂逐笋舆飞梦绕相思遮莫溘阳川

松棚侍宴

瞳瞳晓日霭晴晖松幙茏葱傍紫薇丹阙趋跄歌湛露御筵错落肃天威春浮庖脰
琅玕合香沁壶觞沆瀣晞稽首凤楼回鹤署联翩一路瑞烟归

秋夜燕集

苔痕树影鹿床凉冰雪相怜万感忘暑逼疎藤云濯濯雨回寒簷月苍苍半歌半啸
新诗侠非谗非骚旧酒狂宦海天涯青眼合春华偏艳柳渔乡

端午日凤楼侍宴

裊裊薰风霭建章袞龙高倚凤楼墙旌旗披拂霏霞烂鸳鹭联翩剑佩光角黍宴排
天正午琼浆杯满席生香一声天语千官坐响彻云霄瑞鸟翔

赠李聪峦

赤羽朱旗映翠釜风尘落魄旅情难云霄敢负山涛鉴霜雪休弹贡禹冠高馆疎灯
悬夜雨春沟红叶拂晴澜青湘片玉千秋合桂树怀人慰瘦栾

其二

孝廉船泊藕华滨醉眼横看捧檄人五色虹霓龙剑气十年风雨建章春浮云碣石

金茎瑞池草寒塘玉树新落落中原吾辈在花砖睥睨绿莎茵

赠李台臣

关塞笳声动角弓春愁摇落旅烟中终袍缱绻燕门月彩笔纵横汉苑风春雨一灯
寒夜碧浮云双阙夕阳红千秋莫负蒲轮意曳履传家属巨公

其二

烽火遥惊塞上行那堪握手问浮名闭门拟着潜夫论载酒相怜白也情家衍缥緲
传素谱诗连春雪是难兄龙精一剑虹光合宫草霏微御水平

归兴

岚气氤氲水一涯苍茫落日树烟斜午桥歷歷红亭树秋渚阴阴白藕花卜夜呼瓢
邻舍酒停云试屐埜人家相将二仲谭风月何必青云问碧纱

宿普惠禅舍张太史如盘来晤

羣峰乱石踏青霜骀宕秦淮水一方南国烟花容我辈东篱风雨过重阳寺衔野树
窥青霭杯落藤花问旧狂寒夜霜钟惊旅梦乾坤漠漠塞云荒

雪霁登谢公墩

苍茫俯眺冶城横洒洒凌虚醉晓晴梁寺烟斜林影澹钟山瑞霭雪花明风流点缀
围碁事凭吊霏微蜡屐情缥缈谪仙诗句老荒台古树自峥嵘

灵谷寺

春湿青苔媚客襦斜回十里野云迂珠皈佛塔悬衣舄绣抹春岚点画图苔径长松
烟不断石街双屐响相呼禅宫香傍梅花墅绛雪披纷簇野酤

赠别李非熊侍御

姑射山人退食余紫微十载昼翻书玉皇凭几浮香篆金殿开轩曳绣裾万里风烟
西粤外九天雨露北辰居翩翩骢马秋声迅明月相思客梦遽

遣怀（次王锡周韵）

抱影萧萧昼掩关竹窓松几墨花寒双龙气掩青萍剑五岳光凌紫箬冠眞幻禅锋
惺后悦羸输奕局静中看烧灯倚徙悬高榻细雨霏微鹤梦残

其二

春明久已赋怀归南国秋山澹客衣游戏一官聊寄托栖迟三径任依违花慵白日
呼僮睡草郁青轩看鹤飞明月相思梨树白渔竿冷落滏阳矶

其三

雨声滴沥马声嘶野水青烟听唱骊春树冷魂云淦淦月明客梦草萋萋溪堂鸥隐
寒暄习山寺鸡鸣信宿题长揖梅花浇酒别读书粉社一青藜

游清凉寺登江山一览亭

树杪风高四望山青回幽径竹闲闲春浮烟雨霏微合日拥江湖指顾间丝管纷纷
吹客袂香林寂寂倚禅关千秋罗绮胭脂井消尽莺花载酒还

壬午九日口占

去年今日到滁州太仆先生折柬留丰乐亭前苍树直阳明祠上晓霜稠烟云天纵
双眸入风日山容二客游荻港未荒三径在黄花一笑故园秋

白下再归倦焉卧病郡公枉顾衡门率尔赋谢

苍烟漂落野云浮湖海扁舟汗漫游悬榻秋吟惭卧隐褰帷春色破穷愁星辉赤羽
虹光合剑拂朱霞紫气收才子暂随仙守佩青绶奕叶有金瓯

其二

瑞霭溥沱雨霁余藤萝三径枉高车风流太守恩光剧潦倒狂生礼法疎十里莲花
窥制锦孤城秋色映翻书干旄孑孑林烟直肯踏溪桥访钓鱼

其三

剑影凌霄一啸歌寒芒岂逐世消磨名悬双阙朱幡重赋制连城白雪多恒岳岿巍
惊草木海天浩渺壮烟波醉余击石婆娑舞白眼风尘问若何

其四

黄金为佩玉为人明月清光照水濱晴日看山迎爽气春风载酒草玄文随车瑞霭
千林雨遍地花浓万树蕢罗爵门深耽伏枕朱弦袅袅日相闻

壬午除夕

万骑云奔匝野尘寒埤罨栗倍酸辛不知今夕为何夕恰喜明春尚有春画角风声
吹寂寂戍楼灯影黯磷磷青徐不在榆关外寄语筹兵借箸人

人日

墙阴寂寂荡春澌茗椀绳床伏枕宜冻壁霏微梅树绽拂天歷落雪花垂今年相忆
风烟老到处遥惊角鼓移烽火但能边外遠东山好办草堂资

早朝

三年此日又鹓班回首鲈鱼亦汗颜瑞霭北辰仍雨露秋深南国自间关边横烟燧
今方剧宦拙风尘敢拟闲羸马敝袍凌曙色萧萧客思瞩西山

清明

去年寒食雨花台冉冉春明又客杯南北天涯萍水合阴晴风日柳烟开高斋罗雀
双扉静塞上鸣笳万骑回憑檻清吟天莫莫行藏飘泊野云催

初度

蚤朝鸡唱曙钟寒双阙浮云傍鹄冠时逼暮春犹雨雪人逢初度又长安头颅渐老
行藏拙面目堪憎岁月阑戏彩祇悬游子梦青青滢水问檀栾

怀夷陵夫子

盍簪秋合媿鱼鱼孤影萧萧断续初吾道一时挥麈夜春风十载草玄闾纫兰香满
悬明月萍梗霜殷忆埜渠俯首春陵江树碧笈书缥缈欲踟躇

赠张通政重光

霏微雪径掩莓苔绿野烟花照紫杯皎月双枝今玉树春风八座大银台赢输奕局
青山老醒醉禅锋白社开泉石依然蓬岛在蒲轮天上问盐梅

重阳前五日买菊数本招苏进士张中翰张户部小饮

溟蒙烟雨自清娱木榻苍然客梦孤人我是非云栩栩古今消息月瞿瞿他乡声气
杯无恙此日寒暄菊与俱秋耐逶迤春树老相思湓水问莼鲈

上范质公先生（次方孩未先生韵）

玉尺金绳喆匠能岿然吾道照渊凝风高奋击江河楫天霁孤悬日月灯吏部文章
垂斗极老成风节峙冈陵东山勉为苍生起白社青鞵又岂应

其二

南国苍烟澹隐林蒲轮光罨五云深星辰清切凌霄汉鱼鸟霏微问陆沉九庙有灵
余硕果五湖无兴寄骚吟图书寂寞司空署秋静云涵如水心

其三

倚伏飞潜愿力能雌雌凤鸟九霄层孤臣折槛原无党众正弹冠赖有朋廊庙此时
瞻北斗秦淮久已挂秋罍萧萧忧国霜花老莫向寒烟忆笠僧

其四

烽火西京鐵骑秋莼鲈何事赋三休云霄重曳尚书履烟雨能容钓客裘醒梦当年
怜塞马勲华随地泛江鸥明光虚左盐梅席八座春风遍百州

张进士父绍轩八十五初度

雪泛滹沱白社开晴烟缥缈入寒梅壶天风月呼瓢度阆苑莺花击钵催黄髮丹炉
悬五岳宫袍斑彩兆三台卜邻何日延高榻竹墅松溪杖履陪

癸未除夕（次韵）

清漳客歲女墙风鬢栗魂吹雪影中人又忽来天地暮时余今夕性情空闭门一榻
初无恙读易残宵恰有功脉脉静香春事逼澹然菽水不言穷

题瀛国太夫人寿册

寶婺流晖灿晓烟笙箫吹彻艳阳天帝城佳气貂蝉里王母春风玳瑁筵百歲含饴
萱草旭九霄接羽凤毛翩渭阳世沐恩光渥国庆家祯奕叶延

甲申元旦

澄襟危坐认元正隐隐钟声入曙更烽火梦余天欲旦霰霜阴尽日为明千官袍笏
春烟合一夜屠苏旅炊清湓水石桥残雪绽紫筠綠树忆峥嵘

甲申二月二十三日问马垵野寓寶坻公署有感时令君曹公将内召

山映崆峒带远晖晴楼沙树昔年非地经烽火寒烟乱鸟积斜阳塞草肥古梵疎钟
声遶梦孤城细雨泪沾衣春风信宿神明宰又复辜惟傍紫薇

三月十一日宿天宁寺

妙香疎磬宕新烟花雨霏微一澹然餐素相人犹相马泪余忧国更忧天邨帘寒食

悬千里竹院浮生悟小年鸟静孤云衔塔影青岚窈窕夕阳还

申忠愍诗集卷四

●钦定四库全书

申忠愍诗集卷五

（明）申佳允 撰

○五言絕句

秋江晚唱（用解大绅韵）

江头欵乃声惊散寒云影渔竿挂夕阳月照芙蓉冷
访友不遇

塵市厌烦嚣偶来幽寂处水流半掩扉坐久却忘去
秋日有怀

秋水连天际鹭飞带晚霞景中人不見惆悵咏蒹葭
其二

室迩宁分水人遐似隔山苍苔余蔓草谁与叩柴关
秋兴集古

秋色正潇洒高斋闻雁来我心渺无际随意坐莓苔
其二

明月高秋迥徘徊祇自知凉风吹夜雨摇荡菊花期
其三

日暮秋风起遥闻横笛音凭高何限意萧瑟动寒林
其四

升高临四野秋色老梧桐索莫竟何事清川思不穷
其五

白露沾人袂秋风落日斜忧来谁共语烂醉是生涯
其六

野树苍烟断人闲月影清山空松子落淅沥度秋声
其七

寂寞书斋里萧萧送雁羣弹琴复长啸情发为知音
其八

天际秋云薄床前明月光无由一化羽回立白苍苍
古意

纤纖弄玉盆月挂垂杨树盆中影似郎几回捉不住
其二

郎去几时还抛奴情忒寡呪郎鸚鵡嗔频叫哥哥打

题画

独伴奚奴行为予拖竹杖云深游兴阑扶尔青山上

其二

兀坐不张琴仰看山色渺其中音自看尘世知者少

生子回文

明月映弧桑凤麟锺气香擎杯喜夜永熳烂启祯祥

○六言絕句

闺情

门前绿柳飞絮帘外红桃落花寂寞不知因甚顰眉悄对牕纱

昼寝（辛未都门）

三春未了途债千里忽萦客心午榻一床蝶梦莲湾两部蛙吟

其二

马蹄周回曲巷客屐踏碎庭阴拂簟聊消暑气敲冰暂涤尘襟

其三

汲水呼奴煮茗下帘任我抛书莫愁迎宾倒屣百官薄暮斋居

其四

奔走以劳而倦栖迟惟静则清闲牕再寻午梦奚奴莫下碁声

申忠愍诗集卷五

●钦定四库全书

申忠愍诗集卷六

（明）申佳允 撰

○七言絕句

搏云吟（次李香岩韵）

烧云烁火雪冰敲雾市烟楼撞海潮寒透玻瓈香透水凌虚丹阁紫雯招

其二

冶岚浓澹竹风闲万派红光迸火然惊眼怒涛声触树千层旭霭一晴川

其三

月影瞿瞿鹤影疎雨帘清閤浄名书虎狼喝夜蛟螭舞十丈酸风不怖余

其四

波纹苔绣艳高春青枣黄芽混沌人笑破莲花踏秋雨白茅双屐紫阳巾

其五

琥珀光莹绿雪烹漱松嚼石咀霜英凌空缥缈羣岩静谱尽千春海岳程

其六

山阁高严带雨眠鹿踪鸥迹伴壶天茫茫大地炎云毒抱影萧疎玉麈寒

其七

风云法界电雷书俯仰苍渊碧玉除甲子火流晴雨速闲消静息验居诸

其八

惊虹灼灼碾车尘高揖氤氲演谷神姑射逍遥风月主湖山介绍我为宾

其九

星辰歷歷电光微瑞雨缤纷艷雪霏絕顶昆仑天阙迥琪花阵阵綠云挥

其十

太乙玄根法海尘纵横龙虎位仙人个中认取真开落水涵霜销万树新

其十一

摩天霹雳石尤风鱼静蛟潜澹碧空脉脉淨香焚柏叶五湖烟雨恰相容

其十二

红尘盘礴紫霄顛水印波痕月印天寶筏翩翩浮玉海簫声风遞鹭洲边
黎城遇雨

策蹇聊为汗漫游流光倏忽又惊秋萧萧黄叶蒙蒙雨惹起离人一段愁
独酌闻蛙

风散浓云月色开柴扉半掩独衔杯休嫌幽士贪岑寂鼓吹城南遠送来
寒食

郭外风吹扑面沙如云红粉扇轻遮归忙只怕清明雨懒向堤头折杏花
传胪日马上口占

马逐香尘走帝邦雪霜十载破萤牕沙堤揽轡频回想敢竞看花泛曲江
题卢邻虚别业

东垆亭傍横塘水霞浸波痕影借莲载酒日来聊漱石凉阴偏趁片云天
其二

报道卢仝载茗来园丁解把小门开暮声敲得斜阳下溪寂林暝尚懒回
其三

刻凤主人山水癖林塘卜筑鲜抛金寥寥莫笑山光遠幽絕单消水一浔
其四

螺舟只欲泛霞觞一镜盈盈望欲狂归去溪云飞入梦吟魂日遶藕花香
元夜口占

惊魂无夜不飞摇纔歇芦笳便管箫醉里凄然双泪下岂知今日有元宵
寒食

轻寒雨霁綠杨天士女春畦竞翠钿與梦依稀山色在滏阳极目午桥烟
黎舍中招饮双■〈土答〉寺

■〈土答〉影双悬夏木菲烧灯酌酒话斜晖风轻两袖香随马一路清尘傍舄飞

观麦

雨霁新晴湿野田花城十里麦秋天微官羞列循良传大有应书太史篇
河上

长堤野市入惊涛秋老蛟龙分外骄人逐波光轻似蚁那从一叶竹编桥
其二

秋涛声满夕阳春野树苍茫瓠子宫极目平沙烟水断寥寥鸡犬识新丰
水平感赋

依然河上一舟横去月茫茫此月平回首风涛转眼定凭虚一任自然行
于蕃侄备兵颍上过仪信宿

丝纶新下五云间剑佩翩翩侍从班屐踏衙斋惊齿折铙歌吹送八公山
懷卢邻虚

南浦春深泛鷁舟烟光树色午桥头吟魂幻作清漳梦舄影双飞刻凤楼
宿小宋

一带河流抱浚城寒烟野杵古林平依稀渡蚁桥头月照破尘颜一榻清
闻邹县大兄谪官

风尘潦倒折腰难回首浮云问鶡冠梦入寒庐惊夜雨池塘诗思落河干
哭贾襄一

天上新成白玉楼人间忽失凤麟洲低徊翁句为翁恻萧瑟长途苜蓿秋（首二句
襄一原诗）

迁杞别仪封父老口占

三载惭无赫赫名去时赢得士民情相思一夜并州梦月色秋声满故城
元夕雨雪戏占

自从年里看春后日盼元宵恣咲游到得试灯忙栴沐风吹雪片打帘钩
其二

元夕燃灯阴亦暖红裙谁耐坐深闺只因笙管吹心去新着春鞦不怕泥
其三

灯花影里如云乱笑语喁喁怕失羣冶兴未阑鸡早唱床头盼杀醉郎君
其四

烟火光残人渐少归家箫鼓梦中闻明朝收起新花钿只到清明始上坟
游黄梁祠即景杂咏

传来仙迹在仙祠惹得痴人望更痴一遇乔妆魔道士几回呆盼授青磁
其二

日日青驹不断尘却于此地说仙因遍看四壁题诗客半是当年学步人
其三

石像玲珑仰面看纷纷踏碎碧香龕摩来摩去浑无动毕竟卢生睡得酣
其四

行行古道问仙踪驴背馱来睡眼蒙莫道仙緣非易结仙乡今在睡乡中
赠卢十二竹枝词十二首（次李小有韵）

梅花破腊发琼枝乍转东风淡荡时天上恰开王母宴仙郎醉捧紫金卮
其二

金谷春光烂锦丝和风吹拂万年枝碧云名谪青云里玉液恩浓太液池
其三

花枝浓淡映青阳把酒轻浮琥珀光愿得年年春色懒红梅香递九霞觞
其四

轻烟晴日百年初五色玄芝产玉除学得长生丹已熟蓬莱何事觅仙书
其五

瑞云渺渺葛山巅柳软花柔艳雪天太白谪来尘世里阳春一曲吐青莲
其六

潇洒卢生意自如樽前今日问何吁想因素室传书后天半飞来素女无
其七

何姑曾共泛螺舟咫尺相思天际悠恨杀青鸾无处觅春风醉过岳阳楼
其八

云隔巫山十二峯玄霜独酌醉思浓莫愁应早归金屋织女何须七夕逢
其九

章台柳色应知改回首青青可奈何莫恨瑶台无尔伴云中好去觅仙娥
其十

西行怪道懒于云方朔原来为细君但得玄珠生老蚌何劳飞舄渡河汾
其十一

白玉仙童吹紫鸾飞来次第落沼干他年乱舞琼筵上赢得吴姬笑眼看
其十二

不献蟠桃唱竹枝愿君富寿更多儿明春再祝长安道同上红楼续旧词
申忠愍诗集卷六